

In mais da pais

Las lingias grassas e finas dal settember 2020

DA DAVID TRUTTMANN/FMR

Da temp en temp èsi da decider. Da decider per u cunter. Tranter congèdi da babs u aviuns da cumbat. Durant il settember èn crudadas las decisiuns sco las scrottas da naiv. Ina survista.

Las soras dominicanas da la claustra da Glion han decis da montar panels solars sin lur grond edificzi claustral. Ils totalmain 608 panels èn ussa sin tetg. Uschia ch'igl è finalmain cler sco il sulegl: las mungias retiran lur energia giu da tschiel.

Apropos tschiel: Ina trista decisiun ha stuì trair la Societad da tir Scopì (Medel). L'uniun è vegnida schliada. E quella decisiun è stada uschè trista che era S. Pieder ed il redactor da la FMR han fatg reverenza al mument dal davos tir: «Il tschiel ha bargiu petras larmas la sonda sera cura ch'ìls tiradurs da Medel ein s'entupai ad Urlatsch a lur davos tir.» En cumparegliazion cun quellas lingias è in film da Sergio Leone in simpel Heimatfilm.

Ils da Scuol han da decider gist davart pliras chaussas – p.ex. davart l'avegnir da l'implant da sport Trü e davart taxas communalas. E tar tuttas duas chaussas n'han las autoritads betg gist demussà bun'udida per las opiniuns da la populaziun. Tar l'implant da sport Trü ha la vischnanca bain fatg in grond questunari, nua che var 460 persunas han participà e pudì far valair lur ideas en connex cun il bogn avert. Ma la fin finala ha la vischnanca tuttina preschentà s'atgna «visiun». E tar las taxas communalas spinusas è capità bunamain il medem – la populaziun refusa duas leschas messas en votaziun. Uschia ch'ìl president com-



ILLUSTRAZIUN JON BISCHOFF

munal manegia sunter la sconfitta ch'ì fiss en l'avegnir «dad integrar daplü la populaziun». Ina proposta fiss da far puspè in questunari.

La PCD ha decis per in nov president grischun e per in nov num: Kevin Brunold succeda a Stefan Engler sco president da la partida chantunala. E Gerhard Pfister e sia direziun svizra han decis da dar si il «C» e proponì da numnar la partida en avegnir «Allianza dal center». En discussiun stat er anc ina collavuraziun ubain ina fusiun cun la PBD. – Il pli impurtant en connex cun tut questas discussiuns strategicas è bain che Brunold na

restia a la fin betg enavos sulet, sco «Kevin – Allein zu Haus».

Ladina Heimgartner, fin la fin dal 2019 directura dad RTR, ha decis quest mais per in proxim stgalim en sia carriera professiunala. Ella è da nov Head Global Media tar la Ringier SA ed a medem mument era CEO da la Gruppa Blick. Avant è ella stada var in mezon manadra dal Corporate Center, il qual cumpiglia Corporate Communications, Legal, HR e Data Protection. – Tut cler? Savais tgeninas lavurs che quel post includa? – Per dir sincer: il titel «directura RTR» tunava meglier.

La decisiun per in tattoo è ina decisiun per la vita. La FMR ha rapportà ch'ìl chatschader surmiran Marco Spinas haja sa laschè tetovar sin ses bratsch sura il panorama da l'entira Val d'Err. Ina muscla sco vallada. Sche quai sa metta tras sco nov trend tranter chatschadras e chatschaders, alura ston ils studios da tattoo svelto svelto exercitar da disegnar in u l'auter hotspot da chatscha, p.ex. la Val S-charl e la Val Sumvitg.

Lumnezianas e Lumnezians han stuì decider quest mais tranter maluns e maluns. Gea exact, tranter maluns e maluns. Perquai che tuts dus candidats per il presidi communal, Daniel Solèr e Daniel Blumenthal, han inditgà en l'intervista cun la FMR che lur spisa preferida sajan ils maluns. Ils Lumnezians han lura elegì ils maluns da Solèr, forsia perquai ch'el aveva inditgà sper ils maluns er anc capuns! Qua avevan quels da Mustèr ina tscherna pli simpla. Mo il raclette dad Epp.

Ed alura hai dà anc questas decisiuns: Il Chantun ha decis uffizialmain dad introducir il homeoffice per l'administraziun chantunala, silmain en furma complementara dasper il biro normal. Però enstagl da duvrar il pled englais «homeoffice», pudess ins numnar en il Grischun quella furma da lavur era simplamain «sinergia». La regenza ha er anc decis tge model d'elecziun da deputadas e deputads ch'ella preferiss, ed ella propona in model x insanua tranter maiorz e proporz. U meglier ditg in model quasi maiorz. En mintga cas in model per las partidas grondas. E per finir: La decisiun dal luf è er anc crudada quest mais. Però tar quel tema decidain nus qua libramain da'l laschar star.